

## EMANCIPIMI I GRUAS SHQIPTARE — NJË NGA VEPRAT MË TË RËNDËSISHME TË PARTISË SONË

*Përshëndetje drejtuar Kongresit të 8-të të BGSH<sup>1</sup>*

**1 qershor 1978**

Të dashura shoqe delegate,

Mbarë Shqipëria ndjek me vëmendje e gëzim Kongresin e 8-të të Bashkimit të Grave të Shqipërisë, këtë ngjarje me rëndësi për jetën e vendit. Flamujt e fitoreve, me të cilët ju vini në Kongresin tuaj, janë fryt i përpjekjeve të të gjitha grave të Shqipërisë, të të gjithë popullit tonë për të realizuar programin e Partisë për emancipimin e plotë të gruas dhe të gjithë shoqërisë sonë socialiste.

Është një kënaqësi e veçantë për mua që, në emër të Komitetit Qendror, të të gjithë Partisë dhe timin personal, t'ju përshëndes ju shoqe, gjithë gratë heroike të Shqipërisë socialiste, dhe t'ju uroj punë të mbarë e sukses në punimet e Kongresit. Le të buçasë në Kon-

<sup>1</sup> Kongresi i 8-të i BGSH i zhvilloi punimet nga 1-3 qershor 1978.

gresin tuaj zëri i grave dhe i vajzave tona luftëtare, le të shprehen fuqishëm mendimi dhe vendosmëria e tyre për të çuar përpara çështjen e revolucionit dhe të ndërimit tonë socialist!

Kongresi juaj është një dëshmi e gjallë e atij revolucionit të thellë e të gjerë që ka ndodhur në jetën e gruas shqiptare. Vetë ju që keni ardhur nga kantieret e veprave të reja, nga fushat e lulëzuara, nga zonat malore ose qytetet e mëdha, pasqyroni realitetin madhështor të vendit tonë, gruan e re të çliruar nga shtypja e shfrytëzimi, gruan punëtore e luftëtare, të edukuar, të arsimuar e të kulturuar, që merr pjesë jo vetëm në prodhim, por edhe në drejtimin e shtetit e të Partisë, ju pasqyroni atë barazi të plotë e dinjitet të lartë që i dha gruas socializmi.

Partia ndien një gëzim të veçantë kur shikon te gratë e Shqipërisë atë shkallë të lartë emancipimi për të cilën ajo ka punuar e ka luftuar qysh në ditët e para të themelimit të saj. Te gratë Partia gjeti atë shpirt të pamposhtur të popullit tonë që u rezistoi në shekuj me radhë shtypjes dhe shfrytëzimit, gjeti ato virtyte të larta që do t'i bënte luftëtare të paepura në luftë; te gratë Partia gjeti dhe atë forcë që i duhej atdheut për ndërtimin e Shqipërisë së re. Gratë e vendit tonë kanë treguar kurdoherë me vepra të shumta dashurinë e madhe dhe devocionin e pakufishëm që kanë për Partinë, sepse te Partia ato panë udhëheqësen e vërtetë që do të realizonte ëndrrën e madhe të tyre, që do t'i bënte të lira e të barabarta, të nderuara e të respektuara në shoqëri. Prandaj, me thirrjen e Partisë, grua shqiptare u ngrit me guxim në Luftën Antifashiste

Nacionalçlirimtare, në luftën për të shkatërruar pushtetin e vjetër, për të shkallmuar ligjet e kanunet e tij, për të zhvilluar me konsekuencë luftën e klasave, për të ndërtuar shoqërinë socialiste dhe për të afirmuar normat e zakonet e reja të moralit proletar.

Fitoret e arritura në këto luftëra u çimentuan edhe me gjakun e kulluar të bijave më të mira të popullit tonë. Për Partinë, për popullin dhe për atdheun janë dhe do të mbeten kurdoherë të shtrenjta e të paharruara heroinat e lavdishme Mine Peza e Qeriba Derri, Bule Naipi e Persefoni Kokëdhima, Marta e Prena Tarazhi dhe të gjitha ato gra e vajza që historia i ka vënë përkrah trimave të shquar të këtij vendi.

Nga lartësitë e arritura duket qartë rruga e lavdishme në të cilën ka ecur gruaja shqiptare, rruga e luftës për revolucionin socialist, pa të cilin nuk mund të kishte çlirim dhe emancipim të vërtetë të shoqërisë, pra edhe të gruas në vendin tonë. Kjo rrugë ka qenë e mbetet një shkollë me vlerë të pallogaritshme për gratë e sotme të Shqipërisë socialiste dhe për të gjithë brezat që do të vijnë. Ajo tregon se ç'është në gjendje të bëjë revolucionin proletar për gruan dhe vetë gruaja për revolucionin, kur udhëhiqet nga partia marksist-leniniste.

Emancipimi i gruas shqiptare, një nga fitoret më të mëdha të revolucionit socialist dhe një nga veprat më të rëndësishme të Partisë sonë, madhësohet edhe më tepër kur shohim gjendjen e gruas në botën kapitaliste e revizioniste. Edhe atje flitet për emancipim të gruas, por kjo është vetëm një parullë propagandistike, sepse në realitet në atë shoqëri të padrejtë e çnje-

rëzore, gruaja, më shumë se kushdo, përdoret si plaçkë tregu dhe është objekt shfrytëzimi të pamëshirshëm. Gratë janë ndër të parat viktime të pasojave të rënda të krizës ekonomiko-financiare; ato hidhen në mes të katër rrugëve; ato janë shtresa më e shtypur e më e papërfillur e shoqërisë.

Në sukseset e arritura Partia vlerëson rolin e madh që ka luajtur organizata luftarake e Bashkimit të Grave të Shqipërisë. Gjatë 35 vjetëve të ekzistencës së saj ajo i ka kryer me devotshmëri detyrat që i ka besuar Partia për edukimin e mobilizimin e grave. Prandaj, të dashura shoqe, forcojeni edhe më shumë organizatën tuaj të madhe, rritni rolin e saj, për t'i mbrojtur e për t'i çuar përpara fitoret e arritura, për ta konsoliduar e për ta ngjitur më lart emancipimin e gruas.

Shoqe delegate,

Kongresi i 7-të i Partisë shtroi një program të madh pune e lufte për zhvillimin e gjithanshëm të vendit në rrugën e socializmit, duke u mbështetur, si gjithnjë, në forcat e veta. Ky program nuk mund të realizohet me sukses pa pjesëmarrjen aktive të grave, pa luftën e tyre revolucionare. Partia e thërret gruan në punë, sepse pa të nuk ecën dot prodhimi; e thërret në jetë me armë në dorë, sepse pa të nuk mbrohet atdheu; e thërret të ngrejë nivelin e saj marksist-leninist, arsimor e kulturor dhe tekniko-profesional, sepse pa të nuk mund të lartësohet personaliteti i gruas; e thërret në qeverisjen e vendit, sepse pa pjesëmarrjen e saj nuk

mund të ketë zhvillim të demokracisë socialiste. Partia ka besim të patundur se gruaaja shqiptare, si kurdoherë, do të qëndrojë në lartësinë e detyrave të saj, do të jetë, si gjithnjë, në radhët e para të luftës për socializëm.

Gjithë shoqëria jonë — punëtori e kooperativisti, inxhinieri e tekniku, oficeri dhe ushtari — janë të interesuar për problemet që do të diskutoni në Kongresin tuaj dhe për detyrat që do të merrni përsipër, sepse krah për krah me shoqet e tyre ata ndërtojnë e lulëzojnë vendin, çajnë rrethimin imperialisto-revizionist, mposhtin bllokadat ekonomike e presionin ideologjik të tij, çojnë përpara revolucionin socialist.

Shoqëria është e interesuar shumë edhe për misionin fisnik të gruas si nënë, për rolin e madh që luan ajo në rritjen dhe edukimin e fëmijëve. Vendi ynë ka një brez të ri të mrekullueshëm, besnik ndaj Partisë e popullit. Për këtë kanë meritë të madhe edhe nënat shqiptare, të cilat i rritin e i edukojnë fëmijët t'u ngjajnë për nga trimëria, guximi e patriotizmi dhe t'ua kalojnë për nga dituria e për nga hapat më të mëdhenj që do të hedhin në rrugën e ndritur të socializmit. Gratë e vendit tonë kanë ngulitur në zemrat e rinisë dashurinë për Partinë e për atdheun socialist, ato luftojnë për t'i bërë familjet çerdhe ku rriten shqiponja, ku djemtë e vajzat të frymëzohen për t'i shërbyer socializmit në fusha e në male, në fabrika e kantiere, në shkolla e laboratorë, kudo ku ka më shumë nevojë atdheu. Kjo është një çështje jetike për të sotmen dhe të ardhmen e Shqipërisë socialiste.

Populli dhe Partia janë të ndërgjegjshëm se për emancipimin e pandërprerë të gruas duhen bërë për-

pjesë edhe më të mëdha nga gjithë shoqëria që ajo të vihet plotësisht në rolin që i takon, si forcë e madhe revolucionare e ndërtimit të socializmit dhe e mbrojtjes së atdheut, që të çrrënjosen si te burrat, ashtu edhe te gratë mbeturinat, mentalitetet dhe paragjykimet e vjetra, që të luftohen shfaqjet liberale e konservatore, ndikimet borgjezo-revizioniste, që e frenojnë gruan të tregojë kurdoherë tërë vlerat e aftësitë e saj. Partia është e bindur se organizatat e Partisë dhe ato të masave, organet shtetërore dhe ekonomike, institucionet arsimore e kulturore, mbarë punonjësit do të luftojnë të gjithë së bashku për ta çuar përpara nga fitorja në fitore emancipimin e gruas.

Të dashura shoqe delegate,

Situatat sot në botë janë të turbullta e të rënduara me rreziqe e kërcënime të mëdha për lirinë e parvarësinë e popujve. Borgjezia, imperializmi, sidomos ai amerikan e sovjetik, revizionistët e oportunistët e të gjitha ngjyrave orvaten me çdo mënyrë të shtypin revoltën e masave dhe të mbytin revolucionin, të minojnë luftën çlirimtare dhe të skllavërojnë të gjitha vendet. Superfuqitë dhe ata që i ndjekin nga pas zhvillojnë garën e shfrenuar të armatimeve dhe përgatiten ta hedhin njerëzimin në një luftë të re. Ata nxitin konflikte midis popujve dhe kombeve të ndryshme, ndërhyjnë brutalisht në punët e brendshme të tyre, thurin komplete kundër lirisë dhe sovranitetit të popujve.

Këto situata, që zhvillohen në botë e që ndryshoj-

në vazhdimisht, duhen ndjekur me vëmendje nga të gjithë, për të qenë kurdoherë të gatshëm e të përgatitur për të përballuar çdo rrezik që mund t'i kanoset atdheut tonë. Ato e bëjnë të domosdoshme që të ngremë më lart vigjilencën revolucionare, të çelikosim edhe më shumë unitetin e popullit rreth Partisë, të forcojmë pareshtur mbrojtjen e atdheut. Të punojmë të gjithë, burra e gra, pa u lodhur, për zhvillimin dhe fuqizimin e ekonomisë sonë socialiste, për t'i plotësuar deri në një detyrat e planit të gjashtë pesëvjeçar, për ta bërë jetën e popullit dhe të fëmijëve tanë më të bukur e më të begatshme.

Duke luftuar e duke punuar për ndërtimin e socializmit, gratë e Shqipërisë së re do ta ruajnë e do ta zhvillojnë frymën e internacionalizmit proletar që i karakterizon, do të jenë përkrah grave përparimtare të botës që luftojnë për emancipimin e të drejtat e tyre, do të jenë përkrah popujve që luftojnë për çlirimin e tyre kombëtar e shoqëror.

Qyteti i bukur i Durrësit, ku po zhvillohet Kongresi juaj, është një qytet me tradita të njohura patriotike e revolucionare, me një klasë punëtore të talentuar, me kulturë të lashtë e të zhvilluar. Le të jenë këto tradita dhe atmosfera entuziaste e popullit të Durrësit një frymëzim tjetër për punimet me sukses të Kongresit tuaj!

Nën udhëheqjen e Partisë, me idealet e saj në mendje e në zemër, hidhuni, shoqe, me hov të ri në betejë për të plotësuar detyrat e Kongresit të 7-të të Partisë, luftoni si revolucionare të vendosura për të ngritur edhe më lart lavdinë e atdheut socialist!

Rrofshin gratë heroike të Shqipërisë!

Rroftë organizata luftarake e Bashkimit të Grave të Shqipërisë!

Rroftë Partia jonë e lavdishme!

Lavdi marksizëm-leninizmit fitimtar!

Për Komitetin Qendror të Partisë  
së Punës të Shqipërisë

*Enver Hoxha*

*Botuar për herë të parë  
në gazetën «Zëri i popu-  
llit», nr. 131 (9304), 2 qer-  
shor 1978*

*Botohet sipas librit:  
Enver Hoxha, «Për gruan»  
(Përmbledhje veprash), f. 603*